

國立中山大學語言歷史學研究所史料叢刊之三

教會源流攷

教會源流攷目錄

叙論

教會興起之原因

教會之發源地及蔓延之區域

教會之聯合及其分裂

教會之制度及其弊竇

結論

馬跋

教會源流考

546.9
399
2

教會源流考

教會源流攷

叙論

陶子曰，中國有反對政府之三大秘密團體，具有左右全國之勢力者，是何也？一曰白蓮教，即紅巾也。一曰天地會，即洪門也。凡所謂聞香教，八卦教，一名天理教，神拳教，在禮教等，以及種種之諸教，要皆爲白蓮之分系。凡所謂三合會，三點會，哥老會等，以及種種之諸會，亦無一非天地之支派。雖然，中國大國也，幅幘既廣，則各地之民情風俗，亦因之而有異。最著者，莫如長江流域之居民，與黃河流域之居民。凡屬長江以南，俱屬南部，稱曰南方。凡屬黃河以北，俱屬北部，稱曰北方。南方之人智而巧，少迷信而多政治思想。北方之人直而愚，尙武力而多何以知之？曰凡山東山西河南一帶，無不尊信封禪之傳。凡江浙閩廣一帶，無不崇拜水滸之書。○神權迷信。故曰蓮之教盛於北，而洪門之會遍於南。其間惟江北之地，接近黃河流域，遂兼有南北風氣，教與會因並著。今夫白蓮之教，非不無南下者，然終不能比肩於洪門。洪門之會，亦非無北上者，然終不能並提於白蓮。蓋民情風俗之不同使然也。夫此兩秘密團體，既具有左右全

國之勢力，則有志救世者，不可不探悉其內容也明矣。予前在緬甸時，已作洪門歷史篇，以與洪門志士。（後曾見載於仰光華日報，而庚戌正月間，中興日報另改一名，而又轉載焉。其具名曰志革，亦爲余在仰光時之別名。）今嫌其偏於一端，故今復作教會源流考，以供有志救世者之觀覽焉。

教會興起之原因

我中國人之先祖，本由西方遷入，角立於蠻夷戎狄之間，自樹一幟，故保種自衛之思想，最固結於人心。凡我中國人所崇拜之古英雄，其在君主，如三皇，五帝，三王，五霸等。將相如應龍，祝融，皇陶，周公，管仲等。要皆爲驅除異種人之魁桀而已。東漢之末，西晉之初，太平日久，忘其先世嚴防夷夏之訓戒，遽遷投降之異種人於域內，遂生五胡之亂。然五胡本爲降民，雜處內地，盜竊中國文明，乘隙爲變，以故一切習尚，均同於我。且又自慚其種類卑賤，皆冒竊中國之姓名，以求掩其醜。不久即銷滅無蹤，不過擾亂於一時。與內寇興廢，無甚大異。未能爲吾族之害。及趙宋不德，不防外患，專防內變，邊疆無兵，又盛講專制之術，偃武修文，以柔民氣。中國之國勢，因之大衰。由契丹，而女真，而蒙古，遂陷亡國覆族之慘。明祖興起於一時，不

及三百年，而滿州之禍又興，再蹈亡國覆族之慘。夫以數千年文明之種族，忽然受制於犬羊，其反抗不服之心，要必在在皆是。雖然，欲行反抗，必非一手一足之所能爲，而於是秘密團體之組織，於以興也。在宋之亡，而白蓮之教起。（漢末有張角（卽黃巾）張魯（卽白米黨）等借宗教以聚衆，反抗政府，其手段與白蓮教同。然白蓮教之與黃巾白米，其源流全然不同，無關係也。）白蓮教假借釋氏，實因蒙古君臣，深信佛教。凡佛教之徒，無論有何奸犯之事，均不之深究。故志士乃借以組織團體，而蒙古君臣不之覺也。不及數十年，教勢大盛。於其韓山童，劉福通，徐壽輝，芝麻李，郭子興等兵起。張士誠，（內惟張士誠係鹽梟，餘皆爲白蓮教徒。）陳友諒，明玉珍，朱元璋等繼之。所謂紅巾軍是也。凡紅巾軍，皆白蓮教之教徒。其後卒由朱元璋之手，奏恢復之功，是爲明太祖。明太祖本紅巾軍之一小頭目，未起義之前，爲皇覺寺一丐僧。其後又不幸而明室內亂，滿州乘之，再蹈亡國之慘。志士仁人，不忍中原之塗炭，又結秘密團體，以求光復祖國，而洪門之會設也。何謂洪門？因明太祖年號洪武，故取以爲名。指天爲父，指地爲母，故名天地會。始倡者爲鄭成功。繼述而修整之者，則陳近南也。凡同盟者，均曰洪門，門家門也，故又號曰洪家。既爲一家，卽係同胞。故入會者，無論職位高下，入會尤後，均稱曰兄弟。滿州

之禍，甚於蒙古，改當時中國人復仇之心，比之宋末爲尤切。是以凡新兄弟入會之始，必披其髮，因此辨非我國固有之物。插血盟時，我祖宗寶式臨之，不當以滿洲形式，見我祖宗也。故蒞會執事人員，其成例，當取中國古衣冠服之，亦卽此意。又用草束象人形，或用圖書象人形者一，以爲滿洲皇帝。新入會者，對之射三矢，誓殺滿洲皇帝，以示不敢忘仇也。大清者，滿洲人之國號，與我中國人無涉。大清之皇帝，仇人之首也，故不當承認其爲我中國之皇帝。以故洪門中之兄弟，寫清必作汨，是謂清無主。雖然，爲我仇者，不僅清帝一人，凡滿洲人，皆我仇也，勢無兩立，必盡殺之。故洪門中兄弟，凡寫滿字盡作滿，稱之曰滿無頭。若是乎，我祖宗仇滿之心，固深且切，而無以復加者矣。爲子孫者，奈何其忘之乎！

教會之發源地及蔓延之區域

宋之衰也，大河之南北，及淮北皖北之地，先亡於女真，繼入於蒙古，受塗毒最深。荆襄爲長江門戶，宋人南遷之後，防守頗嚴，而蒙古之攻亦烈。彼此交爭者數十年，卒入於蒙古。其受禍之深，亦不下於大河南北，及江北。夫其受禍最深，則其反抗之心必加甚。（凡初受異種優阨，塗毒愈深，則復仇之心愈烈。若五六次或六七次以後，則凡剛強有恥者，必淘汰盡，所有留者

，僅狡猾異懦之夫而已。）此固理所當然，而又勢所必至者也。白蓮教者，蓋先起於荆襄，漸次伸長其勢力於河南，而爲教門聚會之中心點。由是而皖北，而淮北，而山東，而直隸，而山西。何以知其然也？曰蒙古朝末葉之首倡義舉者，爲鄒普勝，徐壽輝，（二人皆教主）皆湖北人。然劉福通（亦傳教人）爲河南人。韓山童（亦爲教主）爲直隸人。其起義之地，多在河南。則又知河南實爲當時白蓮教之根本重地。蹤韓，徐，鄒，劉四人而起者，爲郭子興，芝麻李等，皆皖北山東人也。而皖北之起義者，復又多於山東。明太祖者，郭子興之部將，實紅巾之小頭目，乘時而奏恢復之功。既爲皇帝，遂隱其前次之事跡。然爲其所自出，不深究其黨類，故其源流不絕。而有明末葉，復有徐鴻儒之亂，爲患不鉅，其原因實由於應之者寡。劉福通之亂，應之者衆。而徐鴻儒之亂，應之者寡。其故何也？曰，由於種族之故。蓋白蓮教初立之本意，本在驅逐蒙古。雖借宗教爲惑人之具，而其間實含有民族主義也。劉福通反抗異族政府，徐鴻儒反抗同族政府，其根本思想既異，故其結果亦因之而有異。所以自滿洲進關以後，白蓮之勢，比於明爲熾者，亦即因此之故。例如七省教案之事，及王倫，林清之事，雖義舉不成，而起事以後之應之者，要皆數倍於明末之徐鴻儒。若論現今白蓮教蔓延之區域，最盛者，爲河南皖北。其次爲湖北直隸山東。再

其次爲山西陝西四川，夫河南皖北湖北山東諸地，本白蓮教原始之發動地。山西陝西四川，則肇自劉之協之徒。浙江亦有白蓮教之教徒，其主教姓徐，乃徐鴻儒之後，由鴻儒失敗之後而遷入。凡入其教者，皆其姻親，甚保秘密，其詳不得而知也。雖然，白蓮教者，原始之名稱也。其後遞演而遞變，於是有聞香教，八卦教，神拳教，在禮教等種種名稱。聞香之教，現今已絕。八卦教，爲白蓮教之分系。神拳教，一名義和拳，又爲八卦教之分系。在禮教，直接改良白蓮之教而起。然以上各教，皆拾餘唾於釋氏而成者。諸教既盛，老氏之徒聞之，乃亦仿效其所爲，竊在禮教之餘緒，而倡爲齋教，又演而爲安慶道友。（新廣東訛作安清，以爲保護清廷而起，大誤之至。）然此二者勢力均不甚著，由於國民心理使然。何以言之？蓋中國匍伏朝山於釋氏之士女衆，而志心朝禮於三清之黨徒少故也。今將現今各教分佈之區域，詳述如下。

（一）白蓮教
尚盛於湖北皖北河南。山東直隸爲其次。山西陝西四川又次之。浙江江西江蘇之勢力甚微。

（二）八卦教
尚盛於河南。其次山東直隸。又其次湖北四川。餘者甚微。

(三) 神拳教

一名義和拳。庚子以前，大盛於山東直隸之間。現於二處之勢稍衰，反大盛於四川。其次陝西河南，其次山西滿洲。浙江江西安徽湖南江蘇諸省，亦間有之。

(四) 在禮教

山東滿洲最盛。皖北淮北次之。直隸又次之。河南山西之勢力甚微。本教在諸教中，最守公德。

(五) 齋教

山東皖北爲多。江北次之。江南浙江江西諸省亦間有之。

(六) 安慶道教

山東皖北有之。其次爲江北。本教在諸教中，勢力最爲微弱。

以上所說，皆教門也。均發源自白蓮。其勢力之分佈，由東而西。復自北而南者也。

明之亡也，其情形與宋異。大河南北，先受諸流寇之殺戮，人跡蕭條。滿州入關之後，以故無人再與抵抗，而起義遂滿者，要皆爲江南之人。其戰爭之最劇者，又莫如浙閩兩粵。然兩粵之地，吾君在也。且率以扼敵者，皆李張二賊之餘燼，非盡人民恢復之義師。浙閩則不然。凡抗清者，皆屬本地義軍。且兩粵之地，已亡於僞帝順治十一二年之時。浙江義師，燬於僞帝康熙三年。福建終於臺灣。臺灣之亡，乃在僞帝康熙二十二年。當時浙閩義師，相依爲唇齒。閩之戰爭，又劇

於浙。故滿政府設總督於其地以控制之。浙爲閩援，故滿政府又令閩督兼統浙地。福建既反抗滿州最烈，其受殺戮最深。故其仇滿之心，亦因之而最切。於是洪門之秘密團體組織興，而天地會出於其間也。明末之世，浙閩義師相聯合，故洪門之傳佈，由閩而先入於浙。浙人廣爲傳佈，以達於江蘇，遂及於江西。僞帝康熙中葉，有張念一者，別稱一念和尚，以浙東之大嵐山爲根據地。○聯結浙西天目山，及太湖之黨徒，與鄱陽之戈陳，不幸而中道失敗，不克竟其志。既遭挫敗，僞帝康熙乃大施淫威，於是天地會之黨徒，遂絕跡於浙江江蘇江西。其在福建者，滿政府反不及知。於是福建之洪門，乃改其方向，流入於粵。隱其天地會之名稱，以避滿人之忌。取洪字邊旁，字之義，號曰三點。或又嫌其偏而不全，非吉祥之瑞，乃又取其義而連稱之，又改號曰三合。○於是由粵而贛而桂，三點三合之勢大著也。朱九濤者，三合會之首領，傳其天地會之緒於洪秀全。秀全復竊取天主教之義以附會之。（其稱天爲父，及國號天國，官以天名，上下一體，皆以兄弟相稱，非盡本於耶穌，而實有根於洪門之舊規而然也。）起義於金田，其一時將帥，無一非洪門之兄弟。如林鳳翔，石達開，楊秀清，馮雲山等是。既得南京，湖南之人，不識其故，以爲妖異。於是曾國藩，左宗棠等，遂練湘勇以反抗之。天國之命運日促。李秀成，李世賢等，知大

仇未復，而大勢已去，甚爲痛心疾首。逆知湘勇嗣後必見重於滿政府，日後能有左中國之勢力者，必爲湘勇無疑。於是乃隱遣福建江西之洪門兄弟，投降於湘軍以引導之，復又避去三點三合之名稱，因會黨首領有考大哥之別號，故遂易其名曰哥老會。於是湘營中哥老會之勢大盛。且凡湘軍所到之處，無不有哥老會之傳佈也。迄今遂以哥老會爲滿政府之一大鉅患。是故三點會也，三合會也，哥老會也，無非出自天地會，故皆號洪門，又曰洪家，別稱洪幫。（俗訛爲紅幫）哥老會既出現以後，乃又有潘慶者，竊其餘緒以組織潘門，或曰潘家，又曰慶幫。（俗訛作青幫）其分立之原因，蓋由潘慶爲販賣私鹽之魁。哥老會之徒皆湘勇，則又爲捕販賣私鹽者也。勢成反對，故別立旗幟。然湘勇之捕鹽梟也其名，而暗通也其實，故雖有反對之名，而無其實。且其源流本出洪門，尙未盡忘木太水源之意。故凡潘門兄弟，遇見洪門兄弟，其開口語必曰潘洪原是一家。介於洪潘二家之間，別有一團體也，名曰江湖團。其人多江湖賣技者流，而附之以流丐。其首倡之人，已不可考，賣技者糊口四方，既不得不締交於洪門，復不能不附和於潘家，始可來往無礙，故介於其間也。其所以別成一隊者，則爲其招呼同業者而發，非有他也。今將其現時分佈之勢力，述之於下。

(一)天地會 名稱已變，其不改名稱之本支，惟福建有之。

(二)三點會 廣東最盛，福建江西次之，廣西又次之。

(三)三合會 廣東最盛，廣西次之，福建江西又次之。湖南之鄰近廣西者，亦間有之。

(四)哥老會 湖北湖南最盛，四川浙江多在東浙雲南次之，安徽江蘇河南山西又次之，江西附近長江處又次之，陝西甘肅新疆又次之，山東直隸亦間有之。

(五)慶 務 名在長江下游，江蘇之蘇州松江常州太倉及鎮江，安徽之巢湖蕪湖寧國廣德及徽州，浙江之杭州嘉興湖州及嚴州衢州，江西之九江南昌及廣信。

(六)江湖團 多傳食於長江上下，安徽之廬州鳳陽，江蘇之淮安揚州，浙江之衢州處州，各有一大團體。然乞丐爲多，狗盜之徒亦不少。

以上所列，均洪門也。肇自天地會，餘皆爲其支流，其勢力之傳佈，由閩而浙，中道挫跌，於是遂由閩而廣而贛而湘，中國遂徧，要之皆由南而北也。

教會雖南北皆有，然其間大有分別。蓋教盛於北而不盛於南，會盛於南而不盛於北，此實由南北人思想不同而然，非可強合也。因思想之不同，而教會之結果，乃各異其趨。教門之弊，結

聯團體，大者流而爲馬賊，小者流而爲打悶，要之皆豪客而已。會黨之弊，結聯團體，大者流而爲賊算，小者流而爲鼠竊，或且爲流丐，要之皆狗盜而已。

教會之聯合及其分裂

按福建亦有少林寺，以傳拳稱。見清乾隆時，毀於峨眉，山僧然與河南少林寺不同。或在雍正時，或云五祖係山西五臺寺僧，非少林寺僧。俟考。

當明之世，有少林寺者，聚徒傳拳術，名聞海內，稱曰外家。（又在浙江有王征南一派，號曰內家。）常於明末，一抗李闖，再抗清庭，而殲其徒。然傳流者尙不絕，至清康熙中葉，其徒復興。語其名爲傳拳，按其實皆傳佈白蓮教也。南方志士，從臺灣覆後，多逃而爲僧，既避難髮之辱，復可傳食四方，以隱爲聯合同志之計。於是遂有洪門之海底（即章程）帶入北方者。聞少林寺名，遂以海底示之，於是自蓮之教，與洪門之會，合而爲一，而五祖出也。五祖者，皆山東人，居於河南之少林寺，爲其師，精於拳術，聚徒授拳傳教，隱謀恢復之舉。既得洪門海底，復益喜事之有爲，定盟南北合力之約。然是時，虜朝勢力正盛，南方洪門，方遭張念一之失敗，一時難以舉義。適虜朝僞帝雍正，用兵西藏，五祖竊念欲復虜廷，莫如操其兵柄，藉其力而一舉滅之。然欲得其兵柄，非先爲之立功不可。西藏非我族類，不妨助虜以滅之。乃率徒從征青海，建立大功，奏凱旋京。五祖即欲在京起義，機事不密，爲虜所知，執五祖并其徒寸磔之，遂毀少林

寺。其徒散之四方，痛師父遭禍之慘，遂立爲祖師，以廣傳白蓮教，而白蓮教之勢力，日益擴張。洪門兄弟，亦以五祖有功洪門，亦爲立祀。從此白蓮洪門，皆奉五祖也。（洪門本祇奉祀天地）然白蓮洪門，雖聯合於一時，究因南北人民心理不同，於是遂由合而復分。從此白蓮自爲白蓮，洪門自爲洪門，分流擴張於南北方。有志者乃復兼取二派之精義，別立一團體，號曰大刀會。（諸會皆起自南，大刀獨興於北。）大刀會遂兼有二者之性質，由大刀會再演而爲小刀會，於社會上亦佔有一方面之勢力也。今將二會現在分佈之區域，述如下。

（一）大刀會

山東之曹州兗州青州爲最多，河南之開封歸德，直隸之大名保定次之，安徽之泗州邳州，江蘇之徐州海州又次之，山西滿州，亦間有之。

（二）小刀會

安徽之鳳陽廬州壽州爲最多，江蘇之徐州海州淮安諸府次之，浙江之金華嚴州台州衢州溫州又次之。浙江之派，由鳳陽傳入。至於福建之小刀會，卽三點三合會之慕小刀會名而改稱之者也。其源流不同。

五祖既遭戕害，其徒偏歷北方各省，白蓮教大興。然其無才能，不足有爲。故雖因清勢之衰，倡立義軍，蔓延者至七省，擾攘者十一年，卒爲清廷所剪滅。當是時也，有才智者，乃改良其

制度，而倡爲八卦教。教主八人，最著者曰林清，是爲坎卦主教。曰李文成，是爲離卦主教。曰牛亮臣，是爲乾卦主教。兼大刀會之首領，遂於虜僞帝嘉慶十八年閏八月十五夜，（卽九月）林清首犯大內，羽林之軍皆逃散，幾覆清廷。不幸因李文成之案，先破於八月初六，援師不至，林清遭擒。李文成由其徒劫出，後亦破滅。曹州牛亮臣斷南北漕運之計，亦歸失敗。於是八卦教之勢熾，而義和拳以盛。義和拳鄙陋少文，不識大計，不明時勢，遂成庚子之變。八卦教既熾，有志者復改良白蓮教之組織，而在禮之教興也。現惟此教最爲完全。白蓮諸教。既徧於北。洪門諸會，亦徧於南。於是繼北方林清而起，首難清廷者，有天地會之洪秀全。秀全之師既覆，三點三合之勢衰，而哥老之勢轉盛。當北方義和拳擾亂之時，而南方亦有唐才常哥老會漢口之舉也。自此以後，起義者遂年年不絕。

教會之制度及其弊竇

白蓮借宗教以聚衆，故以燒香施符爲招徒之不貳法門，其次則傳拳也。入教者，或入粟，或納錢。掌教者，給與憑單。聞亦有放票以聚衆者，然不多觀也。教徒之宗旨，全重信仰，以用術惑人爲第一要義。政體尙專制，大主教爲最尊，主教次之，主教（卽分教者）或分五方以爲治，或分

因而，或分八卦，或分天地，因地制宜，不一其類。主香司錄又次之。凡教徒不得與聞司錄之事，司錄不得與聞主教之事，主教不得與聞大主教之事。傳授衣鉢，極爲嚴謹，故勢力之擴張也緩而難，職員陞遷亦甚不易，凡陞位至主教，率多老耄之夫，英氣已銷磨，而惟貨利之是問，故起義不易。然其有一也，凡洪門大權皆統一，雖相隔數千里，可以遙制之。故主教能首倡起義，則其徒之響應也必多。蓋儼猶以身使臂，臂使指之功用也。惟用迷信，則教徒之信仰山內固，故多能保守秘密，而少反叛之夫。然惟多迷信，故思想多不發達，常釀無意識之舉動，至死不悟也。上下普通相稱曰祖師公，（大主教）曰大師父，曰二師父，（皆主教）曰大師兄，曰二師兄，（主香司錄）下焉者皆徒也而已。洪門借劉關張以結義，故曰桃園義氣。欲借山寨以聚衆，故又曰梁山泊巢穴。欲豫期聖天子之出世而輔之以奏撥清之功，故曰瓦崗寨威風。蓋組織此會者，緣迎合中國之下等社會之人心，取三國演義水滸傳說唐三書而貫通之也。其專貯下等社會者，蓋奏恢復之功，常用多數之人。且下等社會，離官場遠，上下隔絕，不易漏泄也。聚黨之法，以放票爲第一秘訣。凡入會者，納錢給票，會員之宗旨，專崇義氣，取法劉關張。既崇義氣，力求平等主義，故彼此皆稱兄弟，政體主共和，同盟者一體看待，不得與聞秘密之事，故黨勢最易擴張。其職員之

降遷亦易，故分會之成立亦易。值是之故，起義者常連絡不絕。然各山堂分峙，雖有交通不相節制，故接應之者常寡。（因始倡立者，欲速奏功，故組織如此也。）會員既尚義氣，既屬閉門，游行千里，可以皆有招待。然無迷信，義俠之虛名，僅由外鑠，故不能保守秘密，間有因利害關係，而起內鬩者。且各山堂分峙，不相統一，故又常有械鬪之舉。職員之組織法，全係軍國民制度，爲白蓮教之所不能望其肩背，其法制固甚美也。天地三點三合，體制雖仍其舊，而名稱則大變矣。哥老尚存舊制名稱，凡會員共分九級，各團之體制皆同，其間咸缺四七二位。又三點三合會中，或有於大二三四以下，分設左右兩行協理，此乃全無意識者之改亂古制也。其意蓋以大二三四之正位，爲宋江，盧俊義，吳用，公孫勝。左右分列協理二行，以當林沖諸人也。哥老會之制，第一爲督理，而副以總理，即明末時之經略總制（文官名）大招討副招討（武官名）也。是爲元帥。明制僅僅三等，曰公侯伯，故原始洪門，無五堂之說。五堂起自五祖，其後因之復分之爲公侯伯子男。既又變本加厲，用彪麒麟龍龜及彪龍麒麟，各取一字以爲封號。復以五堂之自開山堂者，（山取山寨之義，堂取同堂之義。）稱曰正副龍頭。蓋以督理總理爲君主，而以五堂爲將帥矣。○（本九級之制，從此成十級。）廣東人之所謂紅棍者，即龍頭，（或以爲紅棍即紅旗）是爲老大哥。

○五堂爲大哥，第二爲聖賢，卽參軍也。開堂之時主香，故又有香主之稱，廣東人稱曰白扇，是爲老二。第三曰新副，卽巡撫都御史，是爲老三。第四本有，掌錢穀，當布政司之職，相傳以犯規約被誅，後遂不設，錢穀之事以新副兼之。第五曰紅旗，卽按察使及副使兵備道也。（廣東人或稱地頭）掌軍正事，因廢第四，故於第五設副紅旗也。第六藍旗，卽按察僉事分巡道也，稽察會員一切內外事宜，是爲老六。第七亦以罪誅，因廢不設。特於第六添設藍旗副管事。第八巡風，（東廣人名曰草鞋）偵探一切事宜，是爲老八。第九卽大九小九也，爲普通會員。然明祖之興也，降蒙古朝漢人有功受爵祿者，沒其妻孥爲官妓，稱曰樂戶，或稱爲教坊。又恨陳友諒，貶其不降者，（卽戈陳等）皆不得與齊民齒。組織洪門者，欲廢此制，則礙於祖制。然罪人不孥，古有明訓，又況登庸人材之際，有歸附者，不便拒之。故於老九之下，復設大麼（麼俗訛作滿）小麼大么小么七牌八牌等之名目以處之。有功者陞總么麼，可以平步入五堂。旣入五堂，亦卽可以自開山堂矣。普通稱呼龍頭曰老大哥，五堂香主新副曰大哥，紅旗藍旗巡風曰二哥，餘稱三弟。規約十條，所謂十條十款也，犯者死罪。新副以上，犯此十條規約者，當自殺。如不自殺，由衆逼之。所謂上三把兄弟犯了教，自己招坑自己跳是也。自四至六，犯規約者，由老大逼令自殺，所謂中

三把兄弟犯了教，自己拿刀自己殺是也。自七至九，犯規約者，則令紅旗行刑，所謂下三把兄弟犯了教，三刀五斧莫輕饒是也。由此觀之，其立法固甚美也。

結 論

以上各教門，各洪門，皆有派別。有始倡者，有繼述者。其他如祖師教，魯班教，五穀教，觀音教，白布會，千人會，關帝會，岳王會，紅旗黨，白旗黨，黑旗黨，烏帶黨。（黨與會同）大者聚徒數萬，小者結黨數千，皆興起於一時之間而已，非有積厚流光之勢力也。然所謂教，要皆取法白蓮。所謂會及黨，要皆寫影洪門。非均能有別出之心裁也。其他麼么團體，多不勝數。若論運動，則開通教門也難，結連黨會也易。握權黨會也易，伸勢教門也難。若論運用，則駕馭教門也易，而駕馭黨會也難。欲得教門之死力也易，欲得黨會之死力也難。若論形勢，教門之徒，逼近京師，然交通海口也難。洪門之黨，易通海口，然其隔京師也頗遠。現今之革命黨，亦交接洪門者多，而交接教徒者少，雖然，教門洪家，再合之期，必不遠矣。

教會源流攷跋

右教會源流攷，乃紹興陶成章遺著。昔年家仲兄幼漁先生留學日本江戶，適陶君亦居留于彼，時相過從，甚相得也。仲兄云，「陶君讀書，能過目不忘，曾在某校，任歷史，其講義不寫稿，在教室中，手執粉筆，寫於黑板，長篇弘論，悉左氏博，史記，漢書原文也。」又嘗改訂夏曾佑中國歷史春秋時諱文，今存仲兄處。紀元前一年春，陶君要余至南洋執教鞭，余以事不克成行。是年秋，革命功成，陶君將其著述，悉拉雜摧燒之，此編爲僅存之碩果，今特排印，以餉嗜陶君書者。惜中國五千年開化史上古史一冊，當時爲友人假讀，今求之十年，終不能復得，殊爲可惜。同志如有珍藏此書者，可否假余復印，太玄必有相當之報。陶君被刺後一七年五月一日馬太玄跋。

原書爲共和二七五一年庚戌，由章太炎師等合編教育今語雜誌社印行。共和者，周召共和也。太炎師因中國歷史至共和元年（公曆前八四一年）始有年代可攷，故取之。近年上海有某書局者，取教育今語雜誌中太炎師白話文（末一篇非太炎師作，乃吾友疑古玄同作，亦誤入）印行

小冊子，其中凡書共和曆若干年者，皆妄改作共和前若干年。其意蓋以共和爲民國紀元也。傳矣。據玄同云，「該書賈尙未見教育今語雜誌原書，係託人展轉傳鈔於家仲兄者。」吾恐其果見原書，亦不能讀。因當時太炎師雖主張今語，（白話）而又主張書本字也。雜誌二字，卽其一證。今人有書民國紀元爲共和者，繆甚。宜直書民國幾年，或因其永久，可仿三代銅器例，書幾年幾月幾日者，亦通。一七年五月一四夕，太玄校讎，又記

中華民國十七年五月付印

著作者 陶成章

出版者 國立中山大學語言歷史學研究所

印刷者 廣州市惠愛東路芳草橫街東昇